

Noch emol vunn de Quetsche

Deletzd hawwe merr joo iwver de Quetschekuche geschwätzt, de Schorsch, de Karl und isch, unn dess iss ebbes, was grad in dere Zeit allsfort weider dischpedierd werred. Weil ess dut su Sache gewwe, die hänge zesomme wie Adam unn Eva unn dess iss Quetschekuche unn Wespe.

Was soll merr doo mache, hott de Schorsch gesaad, grad leit e Stick Quetschekuche uffem Dellersche, kimmt schunn die erst Wesp unn dut gugge, ob nitt ebbes defoo ihr schmegge deet. Awwer wissderr, dess iss halt bei dene wie mett dene Migge, wer waaß, wo su e Migg odder su e Wesp grad vorher druffgesotze hott unn was die doodemett ferr Bakderien uff de Kuche bringe dut.

Ja, seet de Karl, unn wennde fuchdele dust, weilde se verjaache willst, werred se aach noch frech. No ja, awwer gestoche worrn sinn die Fraa unn isch dissjohr noch nitt.

Mir aach nitt, seet de Schorsch, awwer vorsjohr bin ich gleich zwaamol gestoche worrn. Was mächsden, wennde gestoche worrn bist?, habb isch gefroochd.

De Schorsch hott gegrint. Isch drigg de erst emol dess Gift außem Fleisch eraus unn donn loss isch merr vunn de Fraa enn Essisch-Lappe mache unn den leesch ich uff den Stich – unn bald duts nimmi wieh.

Seet de Karl: Wenn unser Enkel bei uns sinn unn ess dut Quetschekuche gewwe, doo spillt moi Fraa verriggd. Nitt weesche dem Quetschekuche, naa, weesche dene Wespe. Weilse dauernd Ängst hott, su e Wesp deet sich in e Glas mett Wasser odder Saft odder uff e Stick Kuche schmuggele unn die Kinner deedes nitt seh unn deede die Wesp in ihrn Mund krieg.

Donn missderr renne, saach isch, awwer die Zeit medde Wespe iss langsam erum, weils kiehler worrn iss, awwer jetz, wo die Quetsche schee sieß unn saffdisch sinn, werred Lattwerrsch gemacht.

Ui jeh, seet de Schorsch, wissderr noch, was dess ferr Arwett gewese iss, frieher, wie mir noch Kinner warn? Die gons Wäschkisch war voller Domp unn middedroi hott unser Mudder gestonne und hott in emm große Oimachdibbe meddem Holzleffel geriehrd unn geriehrd, dass nor nitt oobrenne dun, die Quetsche. Awwer heitzedaach iss dess joo koo groß Sach mieh, weil ess dut Gelierzucker gewwe. Doo gieht dess Ruck-Zuck unn die Lattwerrsch iss ferrdisch.

Lattwerrsch, seet de Karl, heeßt bei uns dehoom Leckmaie. Unn wonn moi Fraa Leckmaie mache dut, kimmt koon Gelierzucker droo, die mächt die aach nitt uffem Herd, die mächt se im Backofe.

Ach, saach isch, Herd odder Backofe, Lattwerrsch odder Leckmaie, mir dut se schmecke.

De Schorsch hott gelacht: Ei mir doch aach. Awwer stell derr vor, doo habb isch doch verzählt krieg, dass Fraa in de Nachberschoft ihr Etiketscher uff ihrne Gläser iwverklebt hott, uff dene die gons Zeit Pflaumenmus gestonne hott, weil ihrn Pedder gemoont hott, dass dess nitt su rischdisch flerscherisch wär unn dass dess Mus gons gewiss aus Quetsche unn nitt aus Pflaume gemacht worrn iss.

Isch frooch: Ach wie schee. Awwer was stiehden jetz druff uff dene Gläser?

Ei Lattwerrsch, seet de Schorsch.